

FUNKSJEPROFYL

Omrop Fryslân
Lid Ried fan Kommissarissen

polityk bestjoerlik profyl



Stânplak:

Ljouwert

1. OMROP FRYSLÂN

Omrop Fryslân is dé regionale publike omrop foar elkenien dy't him mei Fryslân ferbûn fielt. De organisaasje makket ferhalen dy't ynformearje, ynspirearje en amusearje en bringt de kontent fia ferskate platfoarms lykas radio, telefyzje en onlinekanalen. De Omrop is tichtby, werkenber en betrouber en yn kontakt mei it publyk. De Omrop wol syn plak yn de Fryske mienskip sterker meitsje en is it paad fan agindafolgjend nei in ferhaal-stjoerde organisaasje ynslein. Dêrby is it ferhaal it útgongspunt en dat bepaalt de foarm en it platfoarm.

De koers

De Omrop hat it plak yn it sterk feroarjende medialânskip op 'e nij formulearre en fertaald nei in strategysk plan 2020-2025 "Kom fierder". It is in ambisjeus plan dêr't de Omrop ûnderdiel en oanjager yn is fan it maatskiplike debat en mei lef dúdlike karren makket dêr't de Omrop him duorsum mei de Fryske mienskip ferbynt. De organisaasje wol ferbine en bouwe oan mienskippen, him ûnderskiede troch eigen typyske tema's te selektearjen en troch sels saken op de aginda te setten. De organisaasje rekkenet it as har ferantwurdlikheid om de Fryske taal en kultuer aktyf út te dragen. By de Omrop is dan ek it Frysk de fiertaal.

De organisaasje

De Omrop is in platte en bûchbere organisaasje. Dat makket it mooglik om de kearnwearden aktyf út te dragen, yn de takomst feroaringen oan te kinnen en dêr fleksibel op ynspylje te kinnen. Ut de ynsette organisaasje-ûntwikkeling wei binne ferantwurdlikheden leech yn de organisaasje belein. By Omrop Fryslân binne sa'n 125 minsken yn tsjinst en wurkje dêrneist 75 freelancers. Dat binne allegearre professionals, minsken dy't harren fak behearskje. Yn de organisaasje wurdt wurke mei multydisziplinêre teams. It primêre proses stiet sintraal en wurdt foarme troch de trije pylders: Ferhalen, Publyk en Technyk. De stêfôfdielingen binne stypjend ferbûn oan dat primêre proses. De Omrop is in kreative organisaasje dy't doart te learen fan flaters en dy't de opdiene ynsichten meinimt yn it better meitsjen fan de organisaasje.

Bestjoer en Tafersjoch

Omrop Fryslân is in stichting en wurdt bestjoerd troch in direkteur-bestjoerder ûnder tafersjoch fan de Ried fan Kommissarissen (RfK). De ynspraak, advisearring en meisizzenskip is boarge yn de ûndernimmingsried (UR) en de redaksjeried (RR). De redaksjonele ûnôfhinklikens is fêstlein yn it redaksjestatút. De Omrop fiert syn taken út konfoarm de rjochtlinen fan de Mediawet en de beliedsrigels fan it Commissariaat voor de Media. Omrop Fryslân hat in Regionale Mediaried (RMR) dy't it media-oanbodbelied fêststelt en evaluearret. De RMR bestiet út fertsjintwurdigers fan de belangrykste yn de provinsje Fryslân foarkommende maatskiplike, kulturele, godstsjinstige en geastlike streamingen. Dêrneist is ek de feriening Freonen fan Omrop Fryslân yn de RMR fertsjintwurdige.

Nei de webside: <https://www.omropfryslan.nl>

2. RIED FAN KOMMISSARISSEN

De Ried fan Kommissarissen (RfK), bestiet út fiif persoanen, sjocht ta op en advisearret frege en net frege oer de missy, it belied, de strategy, de finansjele bedriuwsfiering en de organisatoaryske kontinuïteit fan Omrop Fryslân. De RfK oerleit dêrfoar geregeld mei de direkteur-bestjoerder fan Omrop Fryslân.

Binnen de RfK is foldwaande kennis oanwêzich op yn elk gefal it mêd fan mediaspesifike, finansjeel-ekonomyske, juridyske, polityk-bestjoerlike, organisatoaryske, personele en maatskiplike saken.

De RfK hat sa'n seis kear yn it jier in gearkomste. Twa kear yn it jier is der in gearkomste (in ôffoardiging) fan de Ried fan Kommissarissen mei de ûndernimmingsried. Dizze leden hawwe in maksimale sittingstermyn fan fiif jier en binne ien kear wer te beneamen foar nochris in perioade fan fiif jier. It foech en de ferantwurdlikheden fan de RfK binne regele yn de karbrief fan Omrop Fryslân.

3. TAKEN EN FERANTWURDLIKHEDEN

- It tafersjoch op het belied fan de direkteur-bestjoerder.
- It tafersjoch op it neilibjen fan de wet- en regeljouwing, wêrûnder de Mediawet.
- It tafersjoch op de realisasje fan de doelstellingen fan de organisaasje.
- It tafersjoch op de finansjele jiersyklus, wêrûnder it goedkarren fan it jierferslach, de jierrekken en -begrutting.
- It opstellen fan in ferslach fan de Ried fan Kommissarissen, as ûnderdiel fan it jierferslach.
- It as klankboerd tsjinjen foar de direkteur-bestjoerder.
- It soarch dragen foar in goed funksjonearjende direkteur-bestjoerder.
- It beneamen, skorsen en ûntslaan fan de direkteur-bestjoerder.

4. KOMPETINSJES EN PERSOANLIKE KWALITEITEN

- Yn steat wêze om it belied en de aktiviteiten fan Omrop Fryslân te beoardielen yn it ljocht fan (resinte) politike en bestjoerlike ûntwikkelingen en yn steat wêze om hjiroer in ûnôfhinklik oardiel te foarmjen.
- It fermogen om yn teamferbân, ûnder lieding fan in foarsitter te funksjonearjen.
- Ferbûn wêze mei de gedachtegong, de útgongspunten en de doelstellingen fan Omrop Fryslân.
- Ynteger, ferantwurdlik, kollegiaal en ûnôfhinklik.
- Sterke binning mei de provinsje Fryslân en in (aktive) behearsking fan de Fryske taal.
- Kennis en ynsjoch yn regels en opfettingen oer goed bestjoer (de 'governance').
- Strategysk tinkfermogen en bestjoerlike kennis.
- Yn steat wêze om maatskiplike, politike en technologyske ûntwikkelingen op de lange termyn yn te skatten en de gefolgen dêrfan nei Omrop Fryslân te fertalen.
- Yn steat wêze om it funksjonearjen fan de RfK kritysk te evaluearjen en ferbetterpunten besprekber te meitsjen.
- Foldwaande beskikber wêze foar RfK gearkomsten (en mooglike ekstra oerlizen).

5. PROFYL (POLITYK) BESTJOERLIK

Konfoarm it roaster fan ôfgean komt de portefúlje polityk bestjoerlik beskikber. Hjirfoar siket de RfK in lid mei it folgjende profyl;

- Polityk bestjoerlike ûnderfining
- Relevant netwurk yn Fryslân, Den Haach en it leafst ek yn Brussel
- Romme tafersjochhâldende ûnderfining en kennis fan governance fraachstikken

Mei it each op (de skyn fan) belangeferfrisseling, is it net mooglik om dizze posysje te ferfoljen wannear't jo aktyf binne yn in polityk bestjoerlike funksje yn Fryslân.

6. OMROP FRYSLÂN BIEDT JO

It giet om in beleanne funksje. De beleanning slút oan by it karakter fan de stichting en is yn oerienstimming mei de 'Wet Normering Topinkomens'.



KONTAKT

Foar fragen kinne jo kontakt opnimme mei:

Mark Olman
06-27507384